

ubi dicitur, quod pontifex super caput secundi hirci confiteretur et imprecaretur omnes iniurias filiorum Israel, et deinde per hominem ad hoc paratum mitteret in desertum: atqui pontifex non confitebatur nec imprecabatur peccata futura, sed praterita: ergo.

Alii Hebraei dicunt, quod per Azazel intelligatur aliquis mons valde fortis, in quem hic hircus post imprecationem omnium peccatorum deducebatur, ex eo praecipitandus. Et præterea addunt, alligari solitum ad cornua hujus hirci filum coccineum, quod Deus, quando propitiabatur populo suo, et expiatio ei placebat, convertebat in colorem album; et tunc dispositos fuisse tubicines per montes vicinos, ac post hos rursum alios et alios per totam Iudeam, qui unanimitate clangore tubarum toti terræ nuntiabant, expiationem Deo placuisse.

Sed haec fabulosa esse probari non debet, quandoquidem id per se pateat. Itaque prætermis illis fabulis, non potest nomine Azazel intelligi aliquis mons de quo caper ille praecipitabatur: quia de ista præcipitatione nulla fit mentio in Scriptura; sed e contra expresse habetur, quod emitteretur in solitudinem. Quare

R. et dico: Azazel significat caprum emissarium, prout noster interpres transtulit; adeoque sensus est, quod sors mitteretur, uter duorum caprorum immolaretur Domino, et uter mitteretur in solitudinem; ac consequenter ambo hirci offerebantur Domino, et ambo pro peccatis; sed unus, super quem ceciderat sors pro Domino, dicebatur specialiter offerri Deo pro peccato, quia immolabatur prope ostium tabernaculi, iuxta ceremonias omnium aliorum sacrificiorum; alter vero etiam offerebatur Domino, sed sors hujus cadebat in caprum emissarium, id est debebat, juxta sortem suam, mitti in solitudinem, portans super se iniurias filiorum Israel. Hac expositio

Prob. Quia, ut notant Marius, Jansenius, Menochius, et A Lapide, dictio Azazel componitur ex ει, id est caper, et Αzel, id est abιt seu ablatus est, vel, ut Marius dicit, dimisit. Item LXX. vertunt ἀποτοματιον, apopompaon, quam dictionem S. Ambrosius lib. de Tobia, cap. 20, vertit transmissorem. Symmachus autem et Aquila, teste Theodoro, vertunt: Caprum autem qui emititur in solitudinem. Et recte: nam derivatur a verbo ἀποτέμνω, apopempo, id est dimitto vel ablego; ergo recte transtulit noster interpres: capro emissario.

Obj. I. Versu 10, ubi nos habemus: Et emittat eum in solitudinem, hebraice habetur: Et mittat eum ad Azazel in desertum. Atqui non mittebatur ad alium caprum emissarium, ergo τὸ Azazel, non significat caprum emissarium, sed locum aliquem seu montem, aut petram fortē et arduam, de qua præcipitabatur.

Confirm. Quia I Reg. XX, 19, extabat adhuc lapis qui vocabatur Ezel, adeoque videtur fuisse lapis istius montis vel petrae.

R. Neg. conseq., quia dictio hebraica Laazazel non potest verti ad Azazel, seu verti debet pro Azazel;

nam littera L Lamed quando dictioni præfigitur, significat pro, ut dicit A Lapide: et confirmatur ex textu: nam ubi nos habemus ḥ. 8: Sortem unam Domino, hebraice habetur: Ladonai, id est pro Domino; ergo similiter dum dicitur: Laazazel, significatur: pro Azazel. Alias enim cum ḥ. 8 habetur Ladonai et Laazazel eisdem litteris scriptum, sicut ḥ. 10, sequeretur sensum illius versus esse hunc: Mittet super utrumque sortem, unam ad Dominum, et alteram ad montem Azazel, qui sensus certo foret valde impetus. Itaque sensus hebraicus verborum ḥ. 10 est hic: Et emittat illum pro, sive TANQUAM CAPRUM EMIS- SARUM in desertum.

Ad confirm. dico, lapidem illum vocatum fuisse Ezel, non ab aliqua petra vel loco, sed ex eo quod viam ostenderet viatoribus: unde Ezel significat lapidem itineris, inquit Lorinus.

Add. quod in tot Palestinae delineationibus nullus mons Azazel inveniatur. Et sane si Azazel nomen montis esset, Moyses montem Azazel æque expressisset, ac montes Ararat, Galad, Hor, etc.

Obj. II. Azazel æque significat fortem, ac caprum emissarium; ergo æque accipi potest pro forti, ac pro capro emissario.

R. Neg. conseq., quia inveniri non potest quis sit iste fortis; cui, ad quem, pro quo forti caper ille esset immolandus aut mittendus in desertum. Unde etiam dato, quod juxta textum hebraeum Azazel significet fortem, inde tantum sequitur caprum illum non solum emissarium, sed etiam fortem appellari, quia est animal impetuosum, et presertim, quia portabat super se iniurias totius populi.

P. quid mystice significatum fuerit per utrumque hircum.

R. Quia Christi Domini mortalitas et immortalitas non poterat commode eodem hirco significari; hinc sensu allegorico, eterne Christi figura fuit. Unde I. ille qui pro peccato maectabatur, passibilem Christi naturam significabat; ille vero qui dimitebatur, impossibilem divinitatem. Ita Theodorus in Levit. et S. Cyrilus lib. IX cont. Julianum, ante medium. Vel, ut Procopius exponit, per hircum emissarium significatur Christi anima seu spiritus, qui a morte liber evasit.

2. Hircus pro peccato significat Christum immolatum, emissarius vero denotat genus humanum, quod per Christi mortem liberum dimissum est. Ita pariter S. Cyrilus loco cit.

3. Tertul. lib. cont. Judeos, cap. 14, putat duos hircis significari duos Christi adventus. Origenes per duos hircos intelligit Christum et Barabbam; Rupertus vero Christum et Antichristum.

Tropologice per duos hircos denotantur boni et mali: anagogice electi et reprobi, in die judicii declarandi sorte prædestinationis et reprobationis aeternae. Ita Beda et Radulphus apud Tirinum.

Notant aliqui, dæmonem, ut simiam Dei, similem aliquando expiationem suis injunxisse sacrificulis: nam, teste Herodoto in Exterpe, solebant Ægyptii

imprecations et maledicta congerere in caput victimæ ad id designatae, ut si quid sibi aut Ægypto adversi imminaret, id omne in caput victimæ converteretur. Tunc illam vel in Nilum demergendam præcipitabant, vel Græco seu extraneo alicui homini in foro venalem proponebant, ut videlicet in illius ventrem omnia illa maledicta derivarent.

QUÆSTIO IV. — QUOMODO POTUERIT PONTIFEX SANGUINEM VITULI SPARGERE, ET ORARE CONVERSUS AD ORIENTEM.

Nota quod hic ḥ. 14 dicatur de pontifice: Tolle quoque de sanguine vituli, et asperget digito septies contra propitiatorium ad orientem. Circa hunc textum oritur questio, quomodo potuerit aspergere ad orientem, cum propitiatorium esset ad occidentem. Ad quam

R. Per orientem hic non debere intelligi partem orientalem mundi, sed partem orientalem propitiatorii; et sic stabat in illa parte sanctuarii, quæ erat inter velum et arcum: adeoque pontifex expiabat eositu, quo exteri orabant, respiciens nempe et aspergens partem orientalem propitiatorii; sicuti jam nostri sacerdotes quamvis conversi ad partem orientalem mundi, stant tamen pectore versus partem occidentalem altaris.

Prob. I. Quia nulla assignari potest ratio, cur pontifex intra Sanctum sanctorum deberet se convertere ad partem orientalem mundi, cum totus ritus aspersio, ut et suffitus thymiamatis, ad Dei solius honorem cultumque pertineret, cuius specialis præsentia in area cum Cherubim erat in parte occidentali mundi (ut dictum est cap. XXX Exod.) sicut resipereret partem orientalem, et quæ parte pontifex recte intrabat.

Declarator: Nulla est ratio, quinimo indecens foret, si nostri sacerdotes respicerent occidentem, et dorsum suum altari obverterent, dum orant in missa, consecrant, etc. Ergo similiter indecens fuisset, si pontifex V. L. respexisset orientem, et dorsum suum obvertisset propitiatorio, dum orabat, et sanguinem aspergebat.

Prob. II. Dicitur in textu: Asperget contra propitiatorium, sicuti in nostris rubricis dicitur: Incensabit altare; atqui non recte diceretur aspergere propitiatorium vel incensare altare, si stare dorso versus illud; ergo, etc.

Prob. III. Versu 2 dicitur: Quia in nube apparebo super oraculum. Atqui sacerdos non obverterebat dorsum Domino sibi apparenti aut loquenti; ergo

Dices: cum verba Scriptura debeat intelligi prout jacent, dici potest quod pontifex intrans Sanctum sanctorum, faceret medium circulum, et stare retro propitiatorium; atque sic in illo loco aspergeret contra orientem.

R. Neg. assumpt.; nam vultus Dei loquentis, vel apparetis erat conversus ad introitum tabernaculi, id est, ad orientem; vel ad occidentem, id est, versus locum retro propitiatorium: si erat versus orientem,

fuisset dorsum ejus obversum sacerdoti aspergenti et oranti; si vero vultus fuisse conversus ad sacerdotem stantem retro propitiatorium, id est ad occidentem, tunc dorsum obversum fuisse populo deprecenti et altari thymiamatis fumiganti: que duo inconvenientia sunt utrimque æque magna. Restat igitur dicendum, sacerdotem stetisse ante propitiatorium; quia sic facies Dei placandi erat conversa ad sacerdotem, ad altare thymiamatis fumigans odorem suavissimum Domino, et ad altare holocausti consumens holocausta et hostias pro peccato, et denique ad universum populum pro peccatis suis supplicantem. Circa hanc questionem videri etiam potest Marius.

QUÆSTIO V. — QUUS ALTARIS CORNUA ASPERSERIT PONTIFEX SANGUINE VITULI ET HIRCI.

Postquam omnia in Sancto sanctorum peracta erant, dicitur hic ḥ. 18: Cum autem exierit ad altare quod coram Domino est, oret pro se, et sumptum sanguinem vituli atque hirci fundat super cornua ejus per gyrum. Circa hæc verba oritur dubium, utrum hic debeat intelligi altare thymiamatis, an altare holocausti. Illi qui constituant altare thymiamatis in sancto, communiter sustinent, hoc altare intelligi debere: nec mirum, nam si possit intelligi altare holocausti, deficit præcipuum argumentum quod ex hoc loco contra positionem altaris thymiamatis in Sancto sanctorum urgent hoc modo: Scriptura dicit hic ḥ. 17, quod nullus possit esse in tabernaculo, dum pontifex est in Sancto sanctorum, et mox ḥ. 18 subiungit: Cum autem exierit ad altare, scilicet thymiamatis; ergo altare hoc erat extra Sanctum sanctorum: nam alias non debuisset exire ad illum expiadum: sed debuisset in ipso Sancto sanctorum manere. Interim ut ostendamus hoc argumentum non subsistere,

R. et dico: Altare de quo hic agitur non erat altare thymiamatis, sed altare holocausti, quod stabat extra tabernaculum.

Prob. I. Quia hic a ḥ. 12 usque ad 16 præscribitur ritus quo pontifex debebat expiare Sanctum sanctorum, deinde additur ḥ. 16 quod deberet eodem ritu expiare tabernaculum sive sanctum; et his peractis ḥ. 18 dicitur exire ad altare, ut illud pariter expiat: atqui altare thymiamatis erat certo in tabernaculo, scilicet vel in Sancto sanctorum vel in ipso sancto; ergo quando dicitur exiturus ad altare, intelligi debet altare holocausti.

Prob. II. Quia ḥ. 20 ponuntur tria distincta que emundari debent: Postquam emundaverit sanctuarium, et tabernaculum, et altare. Et iterum ḥ. 55: Et expiat sanctuarium, et tabernaculum testimonii, atque altare. Ergo istud altare expiabatur postquam expiata erant sanctuarium et tabernaculum; adeoque erat extra illa loca, et per consequens altare holocausti. Hinc

Prob. III. In precedentibus actum est de expiatione altaris thymiamatis: nam actum est de expiatione totius tabernaculi, in quo altare illud erat; et con-

sequenter expiabatur simul cum loco in quo erat; ergo jam agitur de altari holocausti.

Prob. IV. Quia alias sequeretur, quod locus ille, in quo erat altare holocausti, id est atrium, non fuisse expiatum, nec aliquis ritus ipsum expiandi prescriptus: atqui tamen æque indigebat expiatione ac sanctuarium et sanctum; nam omnia animalium sacrificia in eo fiebant, poteratque populus locum illum intrare; adeoque necesse erat ut locus ille plures immunditias contraheret; ergo, etc.

Prob. V. Quia totis lib. Levit., Num., et Deut., et omnibus sequentibus nunquam aliud dicitur de altari thymiamatis, quin dictioni *altare* addatur una alia ad distinctionem, ut *altare thymiamatis*, supra c. IV, 7. *Altare quod est... in tabernaculo testimonii*, ibidem §. 18. *Altare aureum*, Num. IV, 11; III Reg. VII, 48; et I Machab. I, 23. *Altare incensorum vel incensi*, I Machab. III, 49, et II Machab. II, 3, etc. Unde ubique Scriptura habet dictionem *altare solam* et sine addito, semper intelligitur altare holocausti (habetur autem plus quam quinquagesies in solo lib. Levit.); ergo similiter hie debet intelligi altare holocausti.

Prob. VI. Quia hic §. 20 immediate post emundationem altaris, dicitur quod Aaron debebat offerre hircum viventem seu caprum emissarium, eique impetrari omnia peccata filiorum Israel: atqui iste hircus offerebatur in atrio prope altare holocausti; ergo intelligitur illud altare mundatum esse immediate antequam offerebatur hircus: et deinde subjungitur, quod illum hircum deberet mittere in desertum. Quo peracto, §. 28: *Revertetur Aaron in tabernaculum*; atqui non legitur egressus de tabernaculo post expiationem altaris, sed ante; ergo intelligi debet illud altare quod erat extra tabernaculum.

Prob. VII. Verso 17 dicitur quod nullus hominum possit esse in tabernaculo, quando pontifex est in sanctuario, donec egrediatur: atqui ille egressus erat egressus ad altare de quo hic est quæstio; et etiam intelligitur egressus de toto tabernaculo; ergo illud altare erat extra tabernaculum.

Prob. prima pars min. Quia immediate post verba: *Donec egrediatur*, subjungit: *Cum autem exierit ad altare*.

Prob. secunda pars min. Quia si tantum intelligetur de egressu ex Sancto sanctorum usque ad sanctum, ubi putant fuisse altare thymiamatis, nemo unquam potuisse scire quandoman pontifex esset egressus, ut possent sacerdotes intrare: nam totum tabernaculum erat undique clausum, et pontifex non habebat vestes pontificales cum tintinnabulis, eorum clangore potuisse ejus egressus audiri; adeoque illud præceptum fuisse inutile, si tantum intellegeretur egressus ex Sancto sanctorum usque ad sanctum.

Prob. VIII. Quia hic de hoc altari dicitur: *Sanguinem vituli atque hirci fundat super cornua ejus per gyrum*. Atqui nunquam poterat fundi sanguis super cornua et per gyrum altaris thymiamatis, sed sem-

per debebat fundi per gyrum altaris holocausti: unde et in expiatione altaris thymiamatis cornua tantum tingeabantur sanguine, et reliquus sanguis fundebatur ad basim altaris holocausti; ergo, etc.

Prob. min. ex cap. IV, 7, ubi dicitur: *Ponetque de eodem sanguine super cornua altaris thymiamatis... omnem autem reliquum sanguinem fundet ad basim altaris holocausti*, etc. Et merito; quia indecens fuisse quod tam multum sanguinis, scilicet duorum animalium fusum fuisset in tabernaculo, qui locus debebat esse mundissimus, nec ullos canales habebat per quos effluere potuisse. Ac proinde si sanguis ille fusus fuisset super cornua per gyrum altaris thymiamatis, tabernaculum non fuisse tanta sanguinis effusione mundatum, sed turpiter maculatum.

Obj. I. Hoc altare vocatur *altare quod coram Domino est*; ergo erat altare thymiamatis, quod ideo dicitur esse *coram Domino*, quia erat ante Sanctum sanctorum. Unde et de eodem altari dicitur supra cap. IV, 18: *Ponetque de eodem sanguine in cornibus altaris quod coram Domino est in tabernaculo testimonii*.

R. Neg. conseq.; nam eodem cap. IV dicitur altare holocausti esse *coram Domino*, dum ibidem §. 21 de hirci pro peccato principis oblato subjungitur: *Cumque immolaverit eum in loco, ubi solet mactari holocaustum coram Domino*. Et sic in pluribus locis dicuntur sacrificia offerri *coram Domino*, quæ tamen offerebantur in altari holocausti. Denique quod altare holocausti dicatur quoque esse *coram Domino*, clarissime exprimit Scriptura III Reg. VIII, 64: *Altare æneum, quod erat CORAM DOMINO, minus erat et capere non poterat holocaustum et sacrificium*, etc. Ac proinde quod ex §. 18 cap. IV, citatum est, huic sententie nequaquam obest: nam quod ibidem agatur de altari thymiamatis, non eruitur ex *et coram Domino*, sed ex verbis immediate sequentibus, scilicet in tabernaculo testimonii.

Obj. II. Dicitur hic: *Sumptum sanguinem... fundat super cornua ejus per gyrum*. Atqui sanguis non fundebatur super cornua altaris holocausti, sed ad basim ejus; ergo.

Confirm. Quando sanguis erat fundendus juxta altare holocausti, tunc omnis reliquus sanguis erat fundendus; hic vero tantum dicitur, quod debeat sumi sanguis et fundi, id est illo tibi cornua altaris; adeoque tantum sumebatur in modica quantitate. Ita Abulensis.

R. Neg. min.; nam supra cap. IV, 30 dicitur: *Tolletque sacerdos de sanguine in digito suo, et tangens cornua altaris holocausti, reliquum fundet ad basim ejus*. Ad id autem quod in confirmatione allatum est, scilicet quod sanguis, qui fundebatur super cornua altaris, tantum sumeretur in modica quantitate, respondet id omnino gratis et infundate dici: 1. quia verbum *fundat*, quo Scriptura utitur, nusquam significat tinctionem, sed solam effusionem; 2. quia ex prioribus cap. hujus libri, item ex cap. XVII certum est, quod sanguis omnium victimarum debuerit ef-

fundi vel super cornua, vel super parietes, id est ad latera, vel ad basim altaris holocausti: atqui hic postquam dictum est, *sanguinem vituli atque hirci fundat super cornua ejus per gyrum*, nihil amplius de effusione reliqui sanguinis dicitur, quod tamen in omni alio sacrificio expresse notatur; ergo signum est quod hic agatur non de sola intinctione, sed de effusione sanguinis. Denique ubi agitur de sola intinctione, exprimitur ut solos digitos tingat in sanguine, ut supra cap. IV, 17; hic autem dicitur quod debeat fundi sanguis super cornua altaris per gyrum; ergo de sola intinctione id intelligi nequit.

Obj. III. Si per altare, ad quod pontifex exibat, debeat intelligi altare holocausti, sequitur quod altare thymiamatis non fuerit expiatum; atqui hoc similiter admitti nequit; ergo.

R. 1. retorquendo argumentum: Si debeat intelligi altare thymiamatis, sequitur quod altare holocausti non fuerit expiatum; atqui hoc similiter admitti nequit; ergo.

R. 2. neg. seq. maj.; nam altare thymiamatis intelligitur expiatum in expiatione Sancti sanctorum, vel in expiatione sancti: locus enim in quo altare illud erat, expiari non poterat, nisi expiatio altari (cujus expiationis ritus habetur Exod. XXX, 10, et hoc lib. cap. IV, 7 et 18). Unde sicuti dum hic §. 33 dicitur: *Et expiabit sanctuarium*, non intelligitur expiatum sanctuarium sine propitiatorio quod in eo erat; ita similiter non intelligitur expiatum tabernaculum sine altari thymiamatis quod, iuxta adversarios, in tabernaculo, id est in sancto, erat.

Obj. IV. Altare holocausti non debebat expiari: nam expiabatur singulis diebus per sacrificia.

R. Neg. assumpt.; quamvis enim singulis diebus expiaret, tamen debebat in festo Expiationis expiari, quia erat expiatio universalis: sicuti si quis pridie obtulisset hostiam pro peccato, debebat tamen illa die cum ceteris etiam offerre ea quæ Num. XXIX præscripta sunt.

Hæc sententia non omnino singularis est; nam illam sustinent Cajetanus, Radulphus, et Lorinus, qui posterior ita scribit: *Impolit me adhuc in eamdem opinionem Radulphi, optimi enarratoris hujus lib. auctoritas, seribentis juxta litteram altare holocausti debere intelligi, quod ante tabernaculi ingressum positum erat*.

CAPUT XVII.

Præcipit Deus, ut sibi soli sacrificent Judæi, neque in quovis loco, sed in solo tabernaculo; prohibetque eis omnem esum sanguinis.

QUÆDAM RESOLVUNTUR. — Petes 1. an lex, de qua §. 3, scilicet quæ prohibet Hebreis occidere quædam animalia extra atrium sanctum, etiam intelligenda sit de occisione profana, ut existimat Theodoretus.

R. Negative, sed intelligenda est duntaxat de occisione sacra, seu de solis sacrificiis.

Prob. I. Quia impossibile fuisse omnia animalia in tota Judæa occidenda, ad tabernaculum vel templum adducere, et inde occisa domum revehere. Nec etiam sufficiens sacerdotes (qui erant soli in illa sententia laniones); nam non omnes simul, sed per vices ministrabant: nec omnes Jerosolymis, sed in suis respective civitatibus (quæ ipsis 48 assignantur Num. XXXV, 7) habitabant.

Prob. II. Quia hic §. 5 illa animalia vocantur *hostie* (hebraice *sacrificia*) quas filii Israel occidunt in agro; id est quas alioquin, nisi obstaret hoc præceptum, passim immolatur essent in agris.

Prob. III ex S. P. Aug. Q. 56 in Levit. dicente: *Illud quod dicit (Scriptura), « Quicumque occiderit vitulum, aut ovem, aut capram in castris... » non de iis dicit quæ occiduntur ad usum vescendi, vel si quid aliud, sed de sacrificiis. Prohibuit enim privata sacrificia, ne sibi quisque quodammodo sacerdos esse audeat, sed illud afferat, ubi per sacerdotem offerantur Deo.*

Prob. IV a rationibus hujus prohibitionis, quarum prima erat, ne sibi quisque sacrificandi munus arrogaret, quod multi invidebant solis filiis Aaron esse concessum; ut constat ex Num XVI; atque sic, contemptis sacerdotibus aaronicis, alios sibi substituerent, cujus peccati graviter reus arguitur Jeroboam rex Israel III Reg. XII, 31, et cap. XIII, 33.

Secunda, ne idolatriæ patret via: *Ita enim nec vanis sacrificabant, inquit S. P. loco cit.*; atque ideo dicitur hic §. 7: *Et nequaquam ultra immolabunt hostias suas demonibus*. Hoc enim natum erat sequi ex illa promissa ubique locorum immolatione. Prohibuit ergo Deus, ne more gentilium ab Hebreis sacrificaretur in excelsis montibus, lucis, aut cavernis. Atque hinc facile intelligitur cur, ut observat S. P. ibidem, Jeroboam rex Israel timens ne legis hujus necessitate populus avelleretur a regno suo, eundo Jerosolymam ad sacrificandum, fabricaverit vitulos aureos.

P. 2. quomodo ergo contra hoc præceptum non peccaverint Elias III Reg. XVIII, 30, et alii qui extra atrium sacrum sacrificaverunt.

R. Quia illi hoc fecerunt ex speciali mandato aut inspiratione Dei. *Cum enim jubet ille*, inquit S. P. Q. cit., *qui legem constituit, aliquid fieri quod in lege prohibuit, jussio illa pro lege habetur, quoniam auctor est legis*. Et post pauca de Elia subjungit: *Spiritus Dei qui fuerat in Elia, quidquid de hac re fecit, contra legem esse non potest, quia dator est legis*. Sic et alii, qui Deo inspirante extra tabernaculum immolarunt, in hanc legem non impegerunt, ut Manue Jud. XIII, 19; Samuel I Reg. VII, 9; David II Reg. XXIV, 18.

P. 3. quare Deus prohibuerit esum sanguinis, et quomodo intelligatur §. 11, animam carnis in sanguine esse.

R. Prima prohibitionis causa est, ut populus israeliticus ab omni crudelitate et belluina feritate avocaretur: hæc enim ratio subjungitur §. 11: *Quia anima carnis in sanguine est*. Ne proinde animam ipsam comedere et absumere videatur, qui sanguinem.